

est, ut Claudius, de quo supra, devicerit, (quod Hieronymi Chronicis asseritur) ut Hadriani tempore Iuvenalis cecinerit:

— *Arma quid ultra*

*Littora Iuverna promovimus, & modo captas
Orcades, & minima contentos nocte Britannos.*

*Quis Romanorum
eas vicerit.*

Deinde vero cum Romanorum in Britannia concideret imperium, Pictorum sedes fuerunt, ut Claudianus Poëta lufit:

— *Maduerunt Saxone fuso*

Orcades.

Qui tenuerunt postea.

Nechtius etiam tradit Ochdam & Ebiffum Saxones, qui sub Britannis meruerunt, cum XI myoparonibus circa Pictos navigasse, & Orcades devastasse. Postea in Norvegorum potestatem & Danorum pervenerunt, unde Gothice loquuntur incolæ: & demum Christiernus Rex Daniæ pacta pecunia, anno cIo cccc Lxxiv, omne jus suum in Regem Scotiæ transtulit. Harum autem præstantissima Pomonia, cathedrali Episcopali celebris, à Solino Pomona diutina, ob diei prolixitatem, vocata, hodie Mainland incolis, quasi continens esset. Ab occidente in orientem exporrigitur, secundum longitudinem; sita inter 59 & 58 gradum latit. Borealis. In littore habet Kirkwall oppidum, cuius vicinia stanni & plumbi fodinas habet. Inde modico freto interjecto & insulis aliquot est Scoticum litus. Nomina aliarum sunt: Hoy, Grams-Oy, Souna, Flotta, Burra, Coupins-Oy, Eglis-Oy, Rouus-

*Insularum
aliquot no-
mina.*

Oy, Fara, Westr-Oy, Wyer, Gres-Oy, Papa, Heth-Oy, Sand-Oy, North-ranals-Oy, Stronsa, South-ranals-Oy, Siapins-Oy, &c. Oetis etiam inter has Ptolemæo recensetur, quam Hethy nunc dici conjectat Cambdenus: An vero Hoy quæ inter has numeratur, Plinii Dumniam dicam, inquit Cambdenus, nondum status. Zelandiam quoque unam earum nominat Iohannes Major, quinquaginta mille passibus in longum porrectam. Incolæ, cum abundant hordeo, potentissimum potum conficiunt, & omnium mortalium dicuntur esse maxime temulenti, & bibaces, nullum tamen in iis unquam ebrium, aut mente alienatum, nullum amentem aut stolidum esse, auctor est Boëthius. vivunt roo annos, & ultra.

Aëris temperies saluberrima per æstatem, *Aëris temperies.* verum brumali tempore tempestates sæviunt. Qui propius insulas perlustrarunt, dicunt bufonem ibidem reperiri, hoc excepto nullum animal venenatum. Arboribus caret. verum insula Hoy frutices & arbuta protrudit. non dubium tamen est, si inibi plantentur arbores, non defore ad earum nutritionem soli genium. Herbarum hortensium, olerumque feraces admodum sunt. Plumbum, ferrum & stannum suppeditant. Moribus, legibus & corporum habitu à Scetlandicis vix differunt, nisi quod hi humaniores sunt, & in peregrinos officiosissimi.

